



Preschaint a la discussiun al podium d'eiran (da schnestra) grondcusglier Rico Lamprecht da la Val Müstair, Josef Thurner, president da la città da Mals, Annemarie Meyer, scheffa executiva operativa dal Glacier Express, Mario Cavigelli, president da la Regenza grischuna, Albrecht Plangger, deputà dal parlamaint talian e Christian Fanzun, capo cumünal da Scuol.

fotografia: Mayk Wendt

Dumandà davo

«Tuots ston trar vi da la medemma sua»

NICOLO BASS

Posta Ladina/RTR: Il Grischun ha fat las lezchas a regard üna colliaziun da tren tanter l'Engiadina Bassa ed il Vnuost. Albrecht Plangger, co guard'oura la situaziun i'l Tirol dal Süd?

Albrecht Plangger*: Il Grischun ha fingià trat tschertas decisiuns concretas. I'l Tirol dal Süd nun es quai amo capità e tuot las vias sun avertas. I's bada però cha l'interess per colliaziuns da tren es avantman e nus varan da trar prosmaing las decisiuns correspondentas. Culla declaranza d'intenziun da Graun, chi'd es gnüda realisada sün iniziativa dal Grischun, han ils regents da las quatter regiuns Grischun, Tirol dal Nord, Tirol dal Süd e Lombardia suottastrichà l'interess per ün triangul da viafiers ed ils bôts da quist'intenziun ston uossa gnir perseguitats. Ün simil proget es finanziabel tras l'UE be scha tuot las quatter regiuns vezzan ils avantags e perseguiteschan il medem bôt.

Co s'ingascha El, sco deputà dal parlamaint talian a Roma, per chi gnian trattas prosmaing las decisiuns necessarias?

Pel mumaint vain electrificada la Viafier dal Vnuost. Quist proget es fingià finanziabel. Otters progets grondos nu sun previs, perquai füssa eir ün bun mumaint per tour per mans üna colliaziun da tren. Uossa stuvaina far squitsch ensebel cun tuot las iniciativas per ragiundscher las decisiuns correspondentas. E organischesch differents arrandschamaints e discussiuns da podium i'l Tirol dal Süd ed illa Lombardia ed uschè provaina da fabricar sù il squitsch. Important es cha tuot las quatter regiuns collavuran.

E co esa cul squitsch invers il Landeshauptmann Arno Kompatscher?

Naturalmaing laina far squitsch invers nossa Regenza, per cha quella metta a disposiziun dapli mezs finanziariels per la planisaziun e a lavur preliminar. I ston nempe amo gnir fattas bieras lavuors per cha'l Regent haja la basa per decider finalmaing a favur da la Terra Retica.

Co vezza El la schanza per la realisaziun d'una colliaziun da tren?

I vuol ün accomodamaint da las quatter regiuns. Lura ha il proget üna buna schanza per gnir realisà. Il regent Arno Kompatscher vaiva nempe fingià sclerir, ch'üna finanziaziun tras l'UE saja our da princip pussibel eir per ün proget culla Svizra e cha l'UE füss eir pronta da decider a regard ün import remarkabel. Però per quai ston tuot ils partecipats trar vi da la medemma sua.

Ingio vezza El ils avantags d'una colliaziun da tren tanter l'Engiadina Bassa ed il Vnuost.

Eu sun ün grond ami da l'Engiadina e mia chasa porta dafatta sgrafits engiadinais. Eu vez üna gronda schanza pel barat cultural tanter las differents regiuns ed eu speresch ferm cha las staziuns da Scuol e da Damal nu saran in avegnir las ultims sün lur traiget da tren, dimperse cha quistas vegnan colliadas. La mobilità sarà eir in avegnir üna gronda valur.

Perche esa important d'organisar similis arrandschamaints co quia a Scuol?

Id es important d'infuormar regularmaing e da sensibilisar. Tantüna as bada cha mincha regiun ha seis interess particulars. Quists interess ston uossa gnir unites e perquai voula blera lavur da persvasiun. Perquai sun similis arrandschamaints importants. Eir la Regenza dal Tirol dal Süd starà tour insacura concretaing posiziun e decider sch'ella preferischa üna colliaziun culla Val Müstair e l'Engiadina Bassa o la colliaziun cul Tirol dal Nord sur il Pass dal Raisch.

*Albrecht Plangger es anteriur president cumünal da Graun e rapreschainta actualmaing il Tirol dal Süd e la Lombardia i'l Parlamaint talian a Roma.

Üna colliaziun per tuots e na be per singuls

Rapresentants dal Chantun, da las regiuns, dals cumüns e dal Glacier Express han discus a Scuol davart la colliaziun da tren tanter Scuol e Mals. Daspö ün mez on ha quella colliaziun surgni nouv vent. Il president da la Regenza grischuna ha chattà plects clers invers ils vaschins tirolais.

Illa sessiun dal december ha inoltrà la deputada Valérie Favre Accola üna dumonda a regard la colliaziun da tren tanter l'Engiadina ed il Vnuost. Ella vaiva tanter oter pretais, cha la Regenza preschainta ün concept per ragiundscher ils bôts da la declaranza da Graun. Fingià l'utuon da l'on passà es nempe gnüda suottascritta a Graun (I) üna declaraziun d'intent da rapresentants da las regenzas dal Tirol dal Nord, Tirol dal Süd, da la Lombardia e dal chantun Grischun. L'intent es da vulair promover il trafic public in fuorma d'una colliaziun da tren. In avrigl ha lura il Grond cussagl incumbenzà la Regenza cun unanimità da las vuschs, da preschantar fin in december 2022 ün concept a man dal plan d'investiuns per infrastructures da la Confederaziun STEP 2040/45.

In lündeschdi saira ha gnü lö üna discussiun al podium per discuter davart

la colliaziun da tren sur cunfin tanter l'Engiadina e'l Vnuost. Da la partida d'eiran il president da la Regenza grischuna Mario Cavigelli, il deputà dal Parlamaint talian Albrecht Plangger, chi deriva dal Vnuost, il grondcusglier Rico Lamprecht sco rapresentant da la Val Müstair, il president da la città da Mals Josef Thurner, il capo cumünal da Scuol Christian Fanzun ed Annemarie Meyer, la scheffa executiva operativa dal Glacier Express.

Tscherchà il contact culs vaschins

«Nus füssan pronts», ha dit Mario Cavigelli, president da la Regenza grischuna in occasiun dal podium a Scuol. Cun evidenza ha el deplorà, chi haja adüna nom cha la Regenza nu saja interessada da realisar ils progets. Ch'els hajan però fingià tscherchà avant ons il contact culs pajais cunfinants per discuter las differents pussibilitats, saja quai üna colliaziun da tren tanter Scuol e Landeck o eir tanter Scuol e Mals. «Tuots duos pajais han refüsà o nun han gnanca reagi a nossas dumondas», ha declarà Mario Cavigelli. Sco rapresentant dal parlamaint talian ha tut posiziun Albrecht Plangger: «Dürant il cumbat electoral 2018 per la Regenza dal Tirol dal Süd d'eira la colliaziun Scuol-Mals süsoss nostra glista. Nos president da la Regenza, Arno Kompatscher, s'ha eir inscuntrà cul commissari respunsabel per la mobilità da l'Uniuon Europeica. Il resultat da quel inscunter es stat ch'üna colliaziun

da tren saja in princip per 40 fin 50 pertschient finanziabla tras l'Uniuon Europeica.» El ha agiunt: «La prontezza es avantman. Nus stuvain uossa far squitsch a la Regenza e perseguitar il proget. Nus vulain cha Mals dvainta ün triangul da la viafier.»

Colliaziun turistica ed economica

Che füssan insomma ils avantags d'uschè üna colliaziun? Tenor Josef Thurner, president da la città da Mals, profitess impustüt il turissem: «Giasts pudessan viagir da l'Italia dal Nord in Engiadina Bassa. Ma eir in tschella direcziun vers la Lombardia.» Annemarie Meyer, la scheffa executiva operativa dal Glacier Express, es statta da l'avis: «Schi's vuol ils giasts viandants as douvra access – access a giasts potenzials, ma eir ün'infrastructura.» Eir per la Regenza grischuna es l'access ün punct important. Mario Cavigelli: «Nus vulain profitar da colliaziuns plü sveltas e sgüras. Ma eir d'una colliaziun per pendularias e pendularis e per giasts.» El intuna però cun veemenza, cha'l chantun Grischun nu vögla be esser pajais da transit.

Pro'l cumün da Scuol es il proget pür al cumanzamaint e las autoritats cumünalas nu sun amo infuormadas in detagl. Christian Fanzun ha però dit: «Per Scuol füss la colliaziun üna gronda schanza per dvantar ün lö da cruschada important. Il cumün sustegna il proget, perquai chi'd es ün'importanta pussibilità da fabricar sù üna

colliaziun turistica ma eir economica.»

Cun sustegn da la front

Mario Cavigelli ha dit: «Avant chi's investischa milliardas per l'infrastructura o imports da plüs milliuns per la planisaziun, ston ils pajais esser daperüna.» Ch'els douvran però eir il sustegn da la front, declera il president da la Regenza «Nus eschan perquai cuntaints cha'l cumün da Scuol vuol, ma sto eir, tour posiziun in chosa.» Christian Fanzun da sia vart ha dit: «Prosmamaing ans vulain nus laschar declerar il proget in detagl. Id es important cha quel gnia perseguità e cha Scuol survegna la colliaziun.» Tenor Josef Thurner sto uossa davart dal Vnuost e da Mals gnir fat politicamaing squitsch per cha la colliaziun gnia realisada uschè svelto sco pussibel: «Eir in vista a la protecziun dal clima nu pudaina spettar amo 20 o 25 ons. Daspö la fin d'eivna passada vezzaina cha la lavina d'autos roudla darcheu. Cun üna buna colliaziun da tren regionala e surregionala as pudesca diminuir quel problem.» Quist squitsch politic es adressà invers il Tirol dal Süd, ingio chi vain spettà üna posiziun clera davart dal «Landeshauptmann» Arno Kompatscher.

Daperüna sun tuot ils preschaints cha d'una tala colliaziun da tren sur cunfin stopchan pudair profitar il chantun Grischun, l'Engiadina, la Val Müstair, il Tirol dal Nord ed eir il Vnuost e na be üna singula regiun.

Andri Netzer/fmr

Iniziativa per daplü trasparenza

Üna gruppa d'iniziants ha inoltrà d'incuort ün'iniziativa per l'introducziun dal princip da trasparenza. Tenor els nu cuntainta la situaziun actuala davart la pratcha dal cumün da Scuol a regard l'infuormaziun e la trasparenza.

D'incuort ha il cumün da Scuol publichà l'inoltraziun d'una iniziativa. Ils iniziants giavüschan cha'l cumün introdüa il princip da trasparenza. L'artichel trais da la constituziun cumünala dess gnir complett seguaintamaing: «I vaglia il princip da trasparenza seguond la ledscha chantunala davart il princip da trasparenza. Documaints ufficials pon pür gnir rendüts accessibels, cur cha la decisiun politica o administrativa, a la quala els servan, es tratta.»

Ils prüms tschinch suotsegnats da l'iniziativa cumünala «Per l'introducziun dal princip da trasparenza» sun Dumeng Bischoff da Scuol, Duri Bezzola da Scuol, Romedi Castellani da Scuol, Duri Denoth da Sent ed Albert Mayer da Sent. Las tschinch personas chi han suottascrit l'iniziativa sco prümas ün autorisadas da tilla retrar fin cha'l termin da la votaziun es fixà. Il temp per ramassar las 150 suottascripziuns bsögnavlas scada als 5 da gün 2022. L'iniziativa po gnir suottascritta suletamaing da personas chi han il dret da vuschar cumünal da Scuol.

Reagi als imbüttamaints

I'l chantun Grischun han ündesch cumüns introdüt üna ledscha davart il princip da trasparenza. Illa radunanza cumünala da Scuol dal principi dal mais marz d'eira la suprastanza gnüda confruntada cun imbüttamaints davart üna trasparenza ed infuormaziun manglusa. «In seguiv vain nus discus

quist tema in suprastanza», disch Christian Fanzun, il capo cumünal da Scuol. In üna dieta a la fin dal mais mai s'haja tanter oter elavurà propostas per amegldrar la trasparenza cumünala. «E lapro vaina decis da preschantar quellas a chaschun da la radunanza cumünala da rendaqunt dals 28 gün», declera'l. L'idea es d'introdüer üna ledscha correspondent. Plünavant manzuna'l chi s'haja gnü contact culs iniziants. «Els sun infuormats davart nos proceder in chosas da daplü trasparenza», uschè il capo cumünal da Scuol.

Sainza üna ledscha separada

Il giavüschan per daplü trasparenza es gnü exprimi in plüssas radunanzas cumünalas. «Andit per inoltrar quist'iniziativa nu d'eira be l'ultima radunanza, dimperse eir la decisiun da la suprastanza cumünala publichada i'l protocol da settember da l'on passà», declera Dumeng Bischoff. In quel esa scrit cha la

suprastanza haja decis da laschar la pratcha d'infuormar «da fin uossa». L'intent dals iniziants es cha las votantas e'ls votants da Scuol survegnan la pussibilità da decider davart il princip da trasparenza. «Implü eschna da l'avis cha'l princip dess gnir introdüt in möd simpel cun duos unicas frusas illa constituziun cumünala e na forsa cun üna ledscha separada, quai chi füss plü char e finalmaing eir plü cumplichà», uschè Dumeng Bischoff. Plünavant manzuna'l chi saja stat üna «gronda lavur» da sclerir e da valütar las soluziuns pussiblas, da congualar co cha oters cumüns grischuns fetschan quai e da formular lura lur proposta. El spera cha'l suveran da Scuol possa prosmaing decider a l'urna davart il princip da trasparenza. «Cun quella decisiun fundamentala vess la suprastanza dafatta üna buna basa per cuntinuar cun sia lavur a bön da meglrar la comunicaziun», conclüda'l.

Annatina Filli/fmr